

A painting of a young shepherd with dark hair and a beard, wearing a yellow tunic and a brown shawl. He is leaning over a rocky ledge, holding a wooden staff in his right hand and reaching out with his left hand towards a small white lamb. The background shows a green hillside and a blue sky.

# **TOLONG JA EDAFOD NAYKAYANG**

Sina'nop Nen Watson Goodman

Dibshi-Eg Maydeko

# Tolong Ja Edafod Naykayang

“TOLONG JA EDAFOD NAYKAYANG” et sikatoy na-olnongan ni nani-inges i olog ton versikolo ja edafod ekelkelasin parti ni Biblia. Memati-ak ja say kamaptengan na komintaryo may-pangkep nonta naysolsolat et sota Biblia met laeng.

Sota Esel nen Apo Shiyos “edafod naykayang” jet maka-tolong nga pasiya ni poson na-agang tan na-owaw ni kinamapteng. No say too ket manbebawi, bowilta-an to'y basol, ewisen tos Apo Jesu-Cristo ja man-iyan shi poso to, tan memati ni emin na poso to kabol son Apo Jesu-Cristo ja Mengisadakan. Si Apo, ipa-amtatoy kina-itsora To son sikato tan i-akan to'y imdeng To tan talna so ni poso ni Emati. Sajay i paras ko nonta tawen ni 1937, jet ekak shineshal iyay ya kas-kas-sha-awa impakikadwak son Apo ingkato nontan. Ewisen taka ngo ja pansoko ka son Sikato jet awat mon Mengisadakan son sikam tan Apo ni biyag mo NIMAN, no eg mo pay laeng dingka.

—Watson Goodman (1920-2002)

Ta si Apo Shiyos, ensemek ton pasiya i totood ja dobong; isonga in-akan to ali sota saksakey bengat ta Anak to, say sota emin na memati so nontan na Anak to, eg meshosa ni ingkatod ingka, no diket may-aknan ira ni biyag ja enshiy to ngintegan. —San Juan 3:16

Say ka-asan ni ebadege ga semek ni sakey ya too, sota pengitodok to ni bakdang to ja angken metey para so nonta kagajem to. Sajay i oltimon ka-asan ni kaba-deg ni semek. —San Juan 15:13

## 1 San Juan 4:8, 9

Sota enshiy semek to ni kait to, eg to amta si Apo Shiyos, ta si Apo Shiyos, poro semek i wara

son sikato. Say amia-an tayo so ey ebadege i semek nen Apo Shiyos son si-katejo, sajay. Inbetkag to ali sota sesakey ya Anak to shiya dobong, say mewad-an kito nonta biyag ja enshiy to engintegan, pangkep nonta inkatey tod koros.

## San Juan 13:1

Shanshani ja manshoki sota piyasta ni Hodiyos ja kowan sha ey Paskowa, jet si Jesus, amta to ey sotan may timpo ja idekjasan to so niya dobong, ja on-oli ma so nen Ameto shi dangit. Nontan na timpo i pengipa-sas to ey enshiy kolang ni semek to so ni totoo ton wared ja dobong, ta sigod ja ensemek to ngoreshan ira.

## Sota Kina-Shiyos nen Jesu-Cristo

### 1 Timoteo 3:16

Mapteng noman nga agpayso i pamati ja inpa-amta nen Apo Shiyos son si-katejo pangkep so nen Cristo Jesus, ta si Jesus nontan, nay-anak shi too et tinong-pal ton emin sota inpangitorong ni Ispirito Santo nen Apo Shiyos son si-kato, jet inon-an ira ni anghil. Jet niman, emankaitoron emin i maypangkep son si-kato shi emin na sakop ni dobong, jet eshakel iray emati. Jet nay-oli ja dimaw shi dangit ja kad-an nen Apo Shiyos.

### San Mateo 1:22, 23

Sajay ya emin i epasemak say mayto-to-wá sota kowan ni para

padto nonta bayag da ja esel nen Apo Shiyos, ja kowan to ey, Wara aliy balasang ja enshiy dakin en imaro-arol so, nem on-anak ali. Say i-anak to ali, daki jet say ingaran sha so nontan na i-anak to ali, si Emanuel. (Say olog niyay ya ngaran shi esel ira ni Hodiyos, Si Apo Shiyos, wára son si-katejo.)

### San Juan 1:1

Nonta eg pay laeng epalsowa iya dobong, wára ngo eshan i kadwa nen Apo Shiyos, jet sotan na kadwa toy engipa-amta alid ja dobong ni maypangkep son Apo Shiyos. Jet si-kato met laeng si Apo Shiyos.

# Si Jesus, ja Anak nen Apo Shiyos

3

## 1 San Juan 4:15

Jet no sipay toon ememati ey si Jesus ket Anak nen Apo Shiyos, si-karay kawad-an nen Apo Shiyos, tan wara ngo ira son si-kato.

## I-Kolosas 2:9

Nemnem jos Cristo, ta si-katoy nay-anak ja inges tayon too met laeng, nem wara pay ngon emin son si-kato sota wara son Apo Shiyos.

## San Mateo 17:5

Jet nonta marama pay laeng ja eman-a-sel si Pedro, ebiglen waray kolpot ta emenenili ja dimespag ali son si-kara ja dinikopan to ira. Jet waray esel ja edapo nodtan ja intenengan sha ja kowan to ey, Sajay i Anak ko jet ensemek ko.

Si-katoy naka kosto-i, isonga patiyon emin i ikowan to. Kowan nonta esel alid kolpot.

## San Mateo 8:29

Jet pimekis ira ja kowan sha ey, Anak nen Apo Shiyos! Nganto may pesing mo son si-kami? Apay dimaw ka din jokami shosa-en, ey aneng nin i timpo to?

## San Lucas 1:35

Kowan nonta anghil ma ey, Sota Ispirito Santo nen Apo Shiyos i maka-amta. Sota panakabalin nen Apo Shiyos, wara di son si-kam. Isonga sajay alin nganga, esanto-an ja enshiy to di panbesolan, jet maykowan ali ey Anak nen Apo Shiyos.

## Inpa-amta nen Jesus no Sifa Sikato

### San Juan 11:25

Simongbat si Jesus mowan, ja kowan to ey, Si-kak i panbiyang so ira nonta nanketey, tan mengikan ni biyang sha; isonga sota memati son si-kak, angken na metey, manbiyang met laeng.

### San Juan 13:13

Sota awag jo son si-kak ja kowan jo ey Maistoro tan Apo jo ket agpayso; jet anam to ta agpayson si-kak sotan.

### San Juan 8:58

Simongbat si Jesus ja kowan to ey, Kinapodpodno iya ikowan ko son si-kayo. Nonta eg pay laeng nayanak si Abraham, sigod ja wara-ak ngoreshan.

### San Juan 9:5

Niman ta wara-ak pay laeng shiya dobong, si-kak i may-eshid ey silew wa ondawag so ni nem-nem ni tood ja dobong.

### San Juan 6:35

Si Jesus, simongbat ja kowan to ey, Si-kak sota may-eshid ey singa tinapay ya emengi-kan ni biyang, jet sota ondaw ali son si-kak ja memati, eg ma-ekang, tan eg ma ma-kew ni shanom.

### San Juan 10:7

Isonga si Jesus, inkowan to may olog nonta arig son si-kara, ja kowan to ey, Kinapodpodno iya ikowan ko son si-kayo, ey say kayeshigan nonta sakepan, si-kak.

## San Mateo 20:30 tan 34

Jet nodta kalsara, waray showen toon ekorab ja timongaw nodta naykilig. Idi intenengan sha ey si Jesus i ondabas ali nodta kalsara, kimeljaw ira ja kowan sha ey, Kaasi-i jokami, si-kam ma mengibengon son Ari David non-ta bayag da! . . . Jet si Jesus, toka ira kaasi-i, isonga pinishat to i matesha. Jet mimapteng iren shagos ja nan-asas. Jet nay-eshom ira ma son Jesus.

## San Mateo 14:19-21

Jet nontan, inkowan to so nonta ira totoo ey ontongaw ira, tep mapteng i edet nodtan, Inda to

sota tinapay tan sota showen piskaw, intangkak tod naykayang jet nan-iyaman son Apo Shiyos. Idi naksheng nga nan-iyaman, shinowashowa to asan toka i-kan so nodta too to, ja si-karay mengiweshis so nonta ira eshakel la totoo. Sota ira totoo, engan ira et napsel iren emin. Idi naksheng ira, inolnong ira nonta too nen Jesus sota ebay-an ja eg kinan ira nonta totoo jet say na-olnong, sampolo tan showen baskit, ja nankepno. Jet say kabebilang ira nonta totoo ja engan, ondaw wa dimen dibo, powira ira sota bibii tan a-anak, ja eg naybilang.

# Si Jesu — Cristo Sikatoy Emalsowa tan Apo

## I-Roma 14:9

Sajay i kabol la eteyan nen Cristo, tan nanbiyagan to mowan, say si-katoy Apo ira nonta wára pay laeng shi biyag, tan sota ira nanketey da.

## San Juan 1:3

Jet sikatoy kabol la edaga-an ni emin na angken nganto. No enshi sotan, enshi ngoy epalsowen angken nganto.

## Inpaspasing 2:36

Isonga si-kayon emin ja kait kon Hodiyos, mesepol la amta-an jon pasiya ey si Jesus ja inpaidansayo shi koros, si-kato sota inpanbalin nen Apo Shiyos ni Apo tayon emin! Si-kato sota sing-

singked tayon inkari nen Apo Shiyos ey ibetkag to din mengisedakan! Sajay i kowan nen Pedro.

## I-Kolosas 1:16

Emin na banag ja wared dangit, tan shiya dobong—saja ma-sas, tan saja eg ma-sas—si Apo Shiyos i emalsowa—angken pay sota ira anghil la kangeto-an shi dangit, nem si Cristoy kadwa ton emalsowa iren jay. Si Cristoy kabol la epalsowa-an sha, say sikato met laeng i ishayaw sha.

## I-Korinto 1:9

Si Apo Shiyos i mebedin na panshindan, jet si-katon mismo i engila-kam son si-kayo ja maykait so nen Apo Jesucristo ja Anak to.

# Si Jesu-Cristo — Sikatoy Mengegsheng ni Emin 7

Sotan alin timpo, emin na toood ka-iliili, mesa-nop ired sango-an to, jet pandinasin to ira, ja inges toy kepesing nonta eman-bantay ni kalniro, ja toka idasin ira sota kanshing so nonta ira kalniro to. —San Mateo 25:32

San Juan 5:22

Si Amak, aliwen si-katoy mengigsheng no sipay maysedakan, no diket in-akan ton emin son si-kak i kanebengan kon mengigsheng ni panbenagan ni emin na too ingkatod ingka.

I-Roma 2:16

Jet no onsabi ali sota timpo ja pengigsheng nen apo Shiyos no sipay maysedakan, angken sota

aramid sha, ono pangkep shen in-em-emot sha, po-jasan nen Cristo Jesus. Sajay ya pemo-jas nen Cristo i sakey nodta naka panitoro ni olay, maypangkep son sikato.

2 Timoteo 4:1

Jet iyay pay i ibilin ko son sikam Timoteo, jet sajay ya naka pemidin son si-kam, kaon-osos-shong ali si Apo Shiyos tan si Cristo Jesus. Jet mesepol la nemnenen mo ey eg medamsis si Cristo, ta to di ita-shel i pantosayan to jet sotan may pengigsheng to ni panbenagan ingkatod ingka ni toon wara pay laeng shi biyag tan sota ira nanketey da.

## 8 Si Jesu-Cristo Bengat i Ompekawan ni Basol

Enshiy eshom ma tood ja dobong nga inbetkag ali nen Apo Shiyos ja mengisedakan, nem eg si Jesus bengat. Kowan nen Pedro. —Inpaspasing 4:12

Sota sakepan ni koral ni kalniro, may-eshig ey si-kak sotan. Isonga sota toon ondaw ali son si-kak, isalakan ko, jet si-karay kay-eshigan nonta kalniro ja ewaya men onsekep tan onbody ya mengenap ni siged ja edet ja kenen sha. —San Juan 10:9

Isonga binanshaanan takejo nonta pilmiro ja kowan ko ey metey kayo ey eg epakawanan i basol jo. Ampet memati kayo ey

si-kak sota naypadton mengise-dakan ja ibetkag ali nen Apo Shiyos, asan mapakawani i basol jo.

—San Juan 8:24

Isonga niman ma, tan angken nganton timpo ali, mebedin na isalakan to ira sota emanshinel son si-kato ja si-katoy mengi-sop son sikara son Apo Shiyos, ta si-kato, wara ni olay shi biyag, ja emengita-shel son si-kara so nen Apo Shiyos. —Hodiyos 7:25

Jet si Jesus, simongbat ja kowan to ey, Si-kak i may-eshig ja shalan, si-kak i podno, si-kak i mengikan ni biyag. Enshiy ang-ken sipa ja maka-edaw so nen Amak, no eg nin manshedan son si-kak. —San Juan 14:6

## San Lucas 19:10

Si-kak sota kowan ni para padto nonta bayag da ey Anak ni Too, jet say kabol la inbetkagan towak so nen Apo Shiyos, say menge-wisak nonta ira toon emantoshong shi keshosa-an sha say maysedakan ngo ira.

## I-Kolosas 1:12-14

Jet kowan mi pay jey amta-an jo komen man-iyaman ni olay son Apo Shiyos, ja Ametayo, ta inkowan to met ey kitoka maykeshi ja mayda-kam so nonta mapteng nga wara son si-kato ja i-akan tod dangit so nonta ira memati son si-kato. Pan-iyaman kayo son si-

kato, tep istay ya intorayan shakito nen Satanas, nem niman, si Apo Shiyos, si-katoy engi-kan son si-katejo ja itorayan nen Jesucristo ja Anak to. Si Cristo, si-katoy ensemek nen Ameto, jet si-katoy kabol la ewaya-an tayo, ono epakawanan ni basol tayo.

## 1 I-Korinto 1:30

Nem si Apo Shiyos, inda-kam tokejo so nen Cristo Jesus; isonga wara may koston daing jo, jet sotan met laeng i edapo son Apo Shiyos. Aliwen sotan bengat, no diket tokejoka ibilang ey singa enshiy basol jo jet kayoka ma mangai-inges son si-kato, jet anongosto ma ey maysedakan kayo.

## 1 San Juan 1:7

Nem no si Apo Shiyos komay onoran tayo ni olay, ja mapteng i tayoka pesing, kenshat ta wára ngoy mapteng nga pekikadwá tayo ni sakey tan sakey, jet sota shala ni Anak ton si Jesus ja imayos shi koros, sotan i kaon-omas so ni emin na basol tayo.

## 1 San Pedro 1:18, 19a

Nontan da, istay enshiy silsilbi ni biyag jo tep say ogadiyon tine-wid jo so nonta ap-apo jo la, poro ngaaw. Nem si Apo Shiyos, indasin totejo noddan na kalasin biyag. Aliwen pilak ono balitok ja emepokaw i inbayad to say kokowa-en tokejo ma, no diket say

inpasing to, mayeshig ey sota shala nen Cristo nonta inkatey tod koros i inbayad to.

Sota naybokbok ka shala nen Cristo nonta inkatey to shi koros i kaybidangan tayo ma ey singa enshiy basol tayo; isonga wáray namnama tayo ma ja isalakan shakito no onsabi sota timpon penosa nen Apo Shiyos so nonta ira eg emati.

—I-Roma 5:9

## I-Ipiso 1:7

Say ewaya-an tayo, ono epakanwanan ni basol tayo, kabol ni shala nen Jesus ja imayos shi koros nonta inkatey to. Sajay i inpasing nen Apo Shiyos son si-katejo ta ebadeg i kaasi to.

San Juan 20:31

Nem saja insolat kod jay ya dib-sho, insolat ko say memati kayo ey si Jesus ket si-kato sota nay-padton mengisedakan ja ibetkag ali nen Apo Shiyos, tan say memati kayo ey si-kato sota Anak nen Apo Shiyos. Jet say sakey pay ja insolatan ko so niyay, say no memati kayo, mewad-an kayo ni biyag ja enshiy to engintegan.

I-Ipiso 2:8, 9

Si Apo Shiyos manangaasi, isonga insalakan shakejo maypang-kep ni pamatiyo so nen Cristo. Aliwen sobadit ni dingkayon map-teng i inkaysalakan jo, no diket dibshin in-akan nen Apo Shiyos.

Sajay i inpasing nen Apo Shiyos ta say enshiy ondastog ey say naysalakanan to, sota maypang-kep ni dingka ton mapteng.

Inpaspasing 16:31

Jet kowan sha ni songbat sha son si-kato ey, Pamati ka son Apo Jesucristo jet maysedakan ka, tan angken sota ira pamiljam.

I-Roma 5:1

Niman ma, ta emati kito so nen Cristo, kinostoan shakito ma nen Apo Shiyos jet mapteng may pen-gidmang nen Apo Shiyos son si-katejo; eg shakito ma shosa-en. Sajay i kabol la eteyan nen Jesucristo ja Apo tayo shi koros.

Jet niman ma, eg kito koma ontakot ja mengshaw ni kaasi so nen Apo Shiyos ja toka iakan alid ma tinongawan to, say kaasi-an shakito nonta nankolangan tayo, jet sotan na kaasi to, si-katoy onto-long son si-katejo ni timpon kasapolan.

—Hodiyos 4:16

Man-iyaman kito ni olay so nen Apo Shiyos ja Ama nen Jesucristo ja Apo tayo. Si-katoy Ama ja manangaasi, tan si-katoy kedepo-i ni emin na tolong say eg kito medismaya.

—2 I-Korint 1:3

1 San Pedro 1:3

Man-iyaman kito ni olay so nen Apo Shiyos ja Ama nen Jesucristo ja Apo tayo, ta ebadege

ga pasiyay kaasi to son si-katejo. Isonga in-aknan shakito ni biyag ja bado kabol ni inpamati tayo son Cristo. Jet niman ma, ebadeg i namnama tayo ey man-ongal kito ali tep si Jesucristo, si-katoy epangdon nan-ongal nontan da.

Tito 3:5

Ni insalakan tokito so. Jet sajay ya dingka to son si-katejo, aliwen sobadit ni kompormin mapteng ja dingdingka tayo, no diket dingka to iyay ta ebadeg i kaasi to son si-katejo. Inomas toy basol tayo, tan inpan-iyen to pay sota Ispirito Santo to son si-katejo; isonga wara ma son si-katejo i badon biyag, ja singa ikay-anak kito.

**San Mateo 11:28**

Jet kowan to pay ey, Si-kayon nayda-karan ni toro ni eshom, daw kayo ali son si-kak ja manbedin ni took. May-eshig ey singa engaksiw kayo ni kalka ja eg jo posi-en. Daw kayo ali son si-kak et pan-ibdey takejo ni digat jo.

**San Lucas 14:17**

Nonta shanshani sota piyasta, engibetkag ni baga-en ton en mengikowan ira nonta na-awis sa bisita ey naysaganen emin, isonga angken ondaw da ira.

Sota ka-onoran na akew ni piyasta ni Hodiyos, sikatoy kapatkan son si-kara, jet nontan na

akew, imetan si Jesus shi sango-an ira nonta eshakel la too jet inkedsang toy esel to ja kowan to ey, No sipa ira sota na-kew ni shanom, ondaw ira di son si-kak jet man-inom ira. —San Juan 7:37

**2 I-Korinto 5:20**

Shinotokan shakami nen Apo Shiyos ja mengi-edagey son Cristo, isonga no mengadok kami ni too, aliwen nemnem mi ni abos, no diket nemnem nen Apo Shiyos sota mika pan-i-adok. Isonga she-waten mi ngarod son si-kayo kabol so nen Cristo ey ipalobos jon i-esop shakejo nen Apo Shiyos son si-kato met laeng.

## 14 Say Too, Alivwen Anak nen Apo Shiyos-so Emin

Isonga sajay den inkowan ko la, sajay i pengamta-an ni toon anak nen Apo Shiyos tan toon wára ngo so nen Satanas. Sota toon ngaaw i toka dagdag-a, ono enshiy semek to ni kait to, aliwen si Apo Shiyos i kawad-an to.

—1 San Juan 3:10

Sota ira toon kaitorong ni Isiprito nen Apo Shiyos, si-karay annak nen Apo Shiyos. Jet sota Isiprito Santo ja inewat jon edapo so nen Apo Shiyos, aliwen panbedin shakejo mowan ni singa baga-en; marinel kayo ma, enshiy jo itakot ja shosa ali, no diket sota Isiprito Santo nen Apo Shiyos ja

inewat jo, sikatoy naybilangan jo ma ey annak tokejo. Jet si-katoy kabol la tayoka ingadni so ma ey si Apo Shiyos i Ametayo.

—I-Roma 8:14, 15

Say enshiy jo kebedawan, ono jo panbesolan. Ta si-kayo, annak shakejo nen Apo Shiyos jet si-kayoy mengilewag ni podno so ira niya tood ja dobong ja ma-owap tan poron makedsel. Si-karay nayaokan jo et piyan kon eg kayo ma-edinan.

—I-Pilipos 2:15

Nem sota emin na too ja engawat son sikato, ono emati son si-kato, inkowan to ey nebeng shen maybidang ey annak ma nen Apo Shiyos.

—San Juan 1:12

# Sota Ka-ikwan nen Apo Shiyos Maypangkep ni Makedsang nga Inom

15

I-Galasia 5:19-21

Sota aramid ja na-alas ja pipiyan ni bakdang nga dag-en, edawag, jet si-kato ira jay: sota pemii ono kompormin ensekig ga aramid, pandeka ni ngaaw ja mengibiyang ni kowan ni eshom, pannedjaw shi sinan shiyos, pan-mantala, sota igem, babakal, apal, bonget, isew, eg peki-olnos shi eshom, pengamkam ni kokowa ni eshom, panboteng, edaos ja pandadsak, tan wara pay i eshom ma banag ja inges niyay ya ngaaw. Ipinshowak mowan iya inkowan ko nontan son sikayo, ey sota sa-jay i aramid to, eg ira mayda-kam

shi pantoshayan nen Apo Shiyos ali.

I-Roma 13:13, 14

Olnosen tayo shorog i bakdang tayo, ta si-katoy koston ogadi ja may-enam nodtan alin maysa-dat ta timpo. Isonga aliwen tayo ma dag-en sota panboteng, ono edaos sa pandadsak, ono sota eshom ma na-alas sa aramid, jet ibi-jag tayo pay sota pekibekal tan pengepal ni eshom. Nem say nemnemen jo et ja dag-en, sota inges ni dingka nen Apo Jesucristo; isonga niman, karejo ma nemnemen ja dag-en sota pipiyan jon dag-en nonta eg kayo pay laeng emati.

Si Jesus, simongbat ja kowan to ey, Say kapatkan so ni emin na bilin, sajay: Si Apo Shiyos i topogen mon sesmekan, ja sikatoy pentoshongan mo ni emin na nemnem mo tan posom. Sajay i kapatkan na bilin ja mesepol la pasiya ja onoren. —San Mateo 22:37, 38

Jet sotan na kowan nen Apo Shiyos, ja mesepol la pati-en, kowan to ey waray inakan ton biyag son si-katejo ja enshiy to engintegan, jet sajay ya biyag, may-ekan bengat so nonta ira memati son Jesus ja Anak to. Isonga sota ira memati son sikato, wara son si-kara iyay ya biyag, nem sota ira eg memati son Jesus ja Anak nen

Apo Shiyos, enshi son si-kara iyay ya biyag ja enshiy to engintegan. —1 San Juan 5:11, 12

Ebadeg i iyaman ko son Cristo Jesus ja Apo tayo, ta in-aknan towak ni kedsang ko, say tong-palen ko sota piyan to. Inbilang towak ey naka mepiyal; isonga shinotokan towak ja mansilbi son si-kato. Nonta pilmiro ja enshi pay laeng i pamatik son Apo Jesus, ngaaw i inkokowan ko pangkep son si-kato, eshakel i pinedigat kon too to, tan bine-baingan ko pay ira. Nem kinaasian towak, ta ekak amta ey ngaaw sotan na dingdingkak.

—1 Timoteo 1:12, 13

Karejo patpati-en sota kowan ira nonta eshom ey palobos sa dag-en ira jay ya edogit ta aramid, ta sota ensekig ga aramid i kabol la shosa-an so nen Apo Shiyos so nonta ira eg memati. —I-Ipiso 5:6

Amtayo met ey sota toon ngaaw i aramid to, eg mayda-kam shi pantoshayan nen Apo Shiyos. Isonga aliwen sota ngaaw wa aramid i jo dag-en, ta naytopoy nemnem jo no kowan jo ey baybay-an nen Apo Shiyos sotan na basol. Ta sota mabii, sota maleki, sota emaya-shom so nonta ira ensekig i shaka dagdag-a shima timplo ni pagano, tan sota daleki ja kait ton daki met laeng i

shaka eshola, eg ira mayda-kam shi pantoshayan nen Apo Shiyos. Kasta met sota makibot, sota magamkam ni kompormi, maboteng, masomang, mengolbod ni kokowa ni eshom, eg ira ngo maydakam. —1 I-Korinto 6:9, 10

Jet mesepol la pati-en jo sotan na esel: dagejoy kowan to, ta aliwen on-anay i pantettetneng bengat. No kowan jo ey on-anay i pantettetneng jo bengat, naytopo itan na nemnem jo. —Santiago 1:22

Sota toon kowan to ey maked-sang i pamati to, nem enshi kari, naytopo sotan na nemnem, jet sikatoy mesepol la mantanshaan.

— I-Galasia 6:3

Apay nga waray basol shiya dobong? Say nanshogi-an to, sota sakey ya too nonta bayag da ja si Adan. Si-katoy kabol la ewara-an ma ni patey shiya dobong. Manipod nontan ingkato niman, emin na too, kenshat ta metey ira ta sapasap pa nanbasol.

—I-Roma 5:12

Jet sotan na ngaaw wa nemnem, basol i pantongpalan to et no meshokshok sota basol, patey ingkatod ingka i pantongpalan to ngo.

—Santiago 1:15

Sota toon say toka nemnem-nema ket sota naydowaman ton dag-en ja ngaaw, say panpa-no-an to, patey ingkatod ingka; nem

sota toon say toka nemnemnema ket sota pengitoshong ni Ispirito Santo nen Apo Shiyos son si-kato, say konoren to ali ngo, biyag ja enshiy to engintegan, tan konoren toy talna.

—I-Roma 8:6

Mesepol la dag-en tayo iyay; pandadsak ka et, tep si agim, kowan ko nem etey, nem wara gayam ja sibibiyag. Istay nantatiw, nem imoli di.

—San Lucas 15:32

Nem enshiy met i jo kinon-od ja mapteng nodta dingdingkayo nontan da, ja si-katoy joka ibebaying niman. Patey ingkatod ingka i panpa-no-an ni inges ira nontan na aramid.

—I-Roma 6:21

## San Juan 11:43, 44

Idi enaksheng nga inkowan nen Jesus iyay, kimeljaw ja kowan to ey, Lazaro, bo-day ka di! Jet si Lazaro, bimo-day ali, ja ebedbe-shan i takday to tan sedi to, tan edibotan i dopa to ni dopot ta shaka idibot ni etey. Jet si Jesus, kowan to so nonta ira toon wara nadtan ey obaren sha sota nay-bedbed say ka-way ton man-ekad.

## San Juan 10:17, 18

Si Amak, ensemek towak ta itolok koy biyag ko ja angken metey. Itolok ko, say odi-en ko met laeng. Angken sipen too, ensiy kabaalan ton onbono son si-kak no ekak itolok i bakdang ko,

ta si-kak met laeng i maka-amta ni biyag ko, no piyan kon metey ono enshi. Mebedin na itolok ko iya biyag ko ja metey, jet mebedin met laeng nga odi-en ko ja manbi-yag mowan, ta si-katoy inbilin nen Amak son si-kak.

## Inpa-amta Nen Jesucristo 1:18

Si-kak sota waray biyag to! Agpayson eteyak, nem nan-ongalak et ekak ma metmetey ing-katod ingka. Si-kak i engegshi nonta tolbek ja mengilokat nonta dawan ira nonta nanketey. Tan si-kak pay sota waray kabedinan ton mengeda ni biyag ni too, nem mebedin na panbiyag ko ali mowan shi patey.

San Marcos 10:17-21

Idi emanda-jat si Jesus ja on-daw shi dawan to, nanbetik aliy sakey ya too ja nantlimokod shi sangoan nen Jesus, ja kowan to ey, Maistoro, mapteng ken too. Isonga ikowan mo ga no ngarantoy dag-en ko say mewad-anak ni biyag ja enshiy to engintegan. Simongbat si Jesus ja kowan to ey, Ngantoy mosoka ikowani so ey maptengak? Abos nen Apo Shiyo ja mapteng. Nem no may-pangkep nonta biyag ja enshiy to engintegan ja inbagam, amtam sota ira bilin nen Apo Shiyo: kareka memono, kareka memii ono mekileki, kareka mengibot,

aliwen mo ba-ngaten ja man-a-sel ni aliwen kosto, kareka menaol ni kait mo; tan shayaw mos inam tan amam. Kowan nonta too ey, Apo, nontan pay laeng nganga-ak ingkato niman, inonod kon emin itan na bilin nen Apo Shiyo. Jet si Jesus, insi-ning to sota too jet nasmekan so nen si-kato, jet kowan to ey, Wara pay laeng i sakey ya kolang mo. Daw ka, mo ilekon emin sota kokowam et sota dako to, iweshis mo so nonta ira nankebiteg. No sajay i pesing mo, maytedo shi dangit i kabaknang mo. Jet no meksheng nga sotan i pesing mo, kayeshom ka di so ira niya took!

1 I-Korinto 3:20

Wara pay i naysolat nonta bayag da ja kowan to ey, Si Apo ShiyoS, amta toy wared nemnem ira nonta kowan sha ey matekal, jet sotan, enshiy silbi to son Apo ShiyoS. Kowan to.

1 I-Korinto 4:5

Isonga eg tayo iba-ngat ja ikowan i kamapteng ono kangaaw ni sakey tan sakey son sikatejo niman na timpo, ta no onmotok alis Apo Jesucristo, emin sota nay-emot, tan angken pay sota pangkep ni toon toka nemnem-nema, ma-amta-an. Sotan aliy

amta-an tayo so no siyen pan-imdengan nen Apo ShiyoS sota dingka tayo, ono enshi.

Hodiyos 4:13

Isonga angken nganton palsowa, eg mebedin na i-emotan to si Apo ShiyoS. Singa dabos ira, ta toka asa i emin, angken nganto ja shaka dagdag-a, jet no ngantoy dingkara, si-katoy songbatan sha di son sikato.

San Lucas 8:17

Sota nayemot niman ja eg ma-on-an, ali nem ekay, tan sota eg ma-amto-an niman, ma-amta-an ali nem ekay.

## Enshi'y Pengingka-an ni Shosa Ira Nonta Emanbasbasol

**2 San Pedro 3:7**

Asan sakey pay, panbediw to iya dobong no ma-onod alin timpo. Iso met laeng nga ikowan to ey mesheshal ira ma naykayang tan saja dobong ja mismon waraniman, jet mepoolan mala ira. Emansesked bengat si Apo Shiyos ni timpon inkesheng ton peneshal to ira nonta toon eg memati son si-kato.

**San Mateo 13:41, 42**

Si-kak sota inpadtora nonta bayag da ey Anak ni Too, jet ibetkag ko ali sota anghil ko jet sikaray mengkal ira nonta toon

emengi-kan ni panbesolan ni kait sha, tan angken pay sota ira ngaaw i aramid sha, say eg ira mayda-kam nodta pantoshayan ko. Jet say pesing ira nonta anghil, iteknal sha ira shima apoy ya empetang nga pasiya. Shiman, mannengnengis i totood man, tan panngedetnget shay sangi sha ni digat sha.

**Inpa-amta Nen Jesucristo 20:15**

Jet sota toon enshiy ngaran shen naysolat nodta dibshon naysolatan ira nonta nay-aknan ni biyag, maykespig ira nodta singa baybay ya emanshedang ni olay.

Naykesheng ey angken sipen too, peshasan to ngoreshan ja metey ni pinsak, jet ikesheng nen Apo Shiyo i panbenagan to no meksheng men metey. —Hodiyos 9: 27

Ta emin kito, onsango kito so nen Cristo, jet bisna-en toy dingdingka tayo nonta kawasha tayod biyag shiya dobong, no mapteng ono ngaaw, jet ewaten tayoy sobadit nonta dingka tayo.

— 2 I-Korinto 5:10

Si Apo Shiyo, shinotokan to sota sakey ya too ja si Jesus, et si-katoy maka-amten mengigsheng ni koston panbenagan ni tood ja dobong ingkatod ingka, jet waray

akew ja inkesheng nen Apo Shiyo ja ketongpal to ali. Si Apo Shiyo, inpanbiyag to si Jesus shi patey; isonga amta ni emin na too ey agpayson si Jesus i shinotokan to. Kowan nen Pablo.

— Inpaspasing 17:31

Sajay ya inkowan ko len dingdingka nen Apo Shiyo nonta bayag da, si-katoy nemnemnemen jo, ta si Apo Shiyo, amta ton mengisedakan so nonta ira totoon emati son si-kato, angken nayaok ira shi nankekedsel la totoo. Jet amta to pay i pesing to so nonta ira eg memati son si-kato ingkatod onsabi sota akew wa inkesheng ton keshosara.

— 2 San Pedro 2:9

Jet si Apo Shiyos i paniyaman tayo, ta enshiy kay-ingesan nonta in-akan ton kaasi son si-katejon too to! —2 I-Korinto 9:15

Jet nontan, sota ira apostol, mas kimedsang iren mengitosho ni maypangkep son Apo Jesus, jey nanbiyang mowan shi patey, jet si Apo Shiyos, ebadeg i kaasi to son si-karen emin.

—Inpaspasing 4:33

Nem sota kaasi nen Apo Shiyos ja inpatewid nen Jesucristo, tan sota basol, ja inpatewid ngo nen Adan, arawin enshiy sha nanningesan. Ta agpayson eshakel i emetey maypangkep ni basol ja inpatewid nen Adan, nem ebad-

badege ngo eshan sota kaasi nen Apo Shiyos ja memekawan ni basol, jet eshakel i totoon naydakam nodta kaasi to. —I-Roma 5:15

. . . Apo Shiyos sota toon edastog, nem sota ira toon ekombaba, si-kara et ngo mowan i toka i-akni ni kaasi. Kowan nonta naysolat. —1 San Pedro 5:5b

Eg mesepol la piditen takejo ta amtayo met sota maypangkep ni kaasi nen Jesucristo ja Apo tayo. Si-kato, baknang nontan da shi dangit, nem inbaba toy bakdang to ja nanbalin ni ebiteg kabol ni pansigshan jo. Jet niman ma, sikayoy may-eshig ey baknang.

—2 I-Korinto 8:9

## Inpaspasing 17:30

Si Apo Shiyos, pinedabas ton binaybay-an sota apil la dingding-ka ni too nontan, ja eg sha amtay pannedjawan sha. Nem niman, say kowan to, mesepol la emin na too ket manbebawi ira et memati ma ira son si-kato.

## San Lucas 13:3

Nem say ikowan ko son si-kayo, enshi. Jet angken si-kayo, no eg jo ibebawiy basol jo, metey kayon emin ja inges toy inkatey sha.

## Inpaspasing 3:19

Isonga panbebawi kayo ni ngaaw wa aramid jo, jet si Apo Shiyos i toshongen jo say omasen toy basol jo.

## Inpaspasing 2:38

Si Pedro, simongbat ja kowan to ey, Panbebawi kayo et emin kayo, panpabonjag kayo ja si Jesucristo i toshongen jon pati-en ni olay, say mepekawanhan i basol jo. Jet ewaten jo sota Ispirito Santo nen Apo Shiyos ja iakan to.

## 2 I-Korinto 7:10

Ta si-katoy toka osala ja panbebawi so ni too. Kowinta ey sotan, emengi-kan ni kaysedakan ni totoo, isonga eg kito manbebawi no sotan i itsoren pandeshingit ni too. Nem apil i panpano-an ni daringit ni tood ja dobong ja eg emati, ta singa toka ira pan-itorong shi patey ingkatod ingka.

## San Mateo 6:14

**Agpayso iyay ya ikowan ko son si-kayo. No pekawanan jo sota ira toon waray nanbasolan sha son si-kayo, si Apo Shiyos ja Amejo shi dangit, si-katoy memekawan ngo son si-kayo.**

## Inpa-amta Nen Jesucristo 3:20

**Itnengi jo, ta singa wara-ak shi sakepan ja emenogtog. Naka on-esel pay jet sota mengitneng, no idokatan towak, onsekepak et me-kipenganak son sikato; man-okob kamin showa.**

## San Lucas 24:27

**Jet si Jesus, in-olog ton emin son si-kara sota naysolat nonta bayag da maypangkep son si-**

kato, manshoki shi dibsho ira nen Moises tan emin na insolat ni para padto nen Apo Shiyos nonta bayag da.

## Inpaspasing 5:31

**Si Apo Shiyos, inpanbiyang tos Jesus, jet niman, inpansaad to; isonga wara shi apit ni kanawan nen Apo Shiyos, ja si-katoy Pangolo tan Mengisedakan. Jet in-aknan toy tood Israel ni waya sha ja manbebawi, say omasen nen Apo Shiyos i basol sha.**

## San Marcos 2:5

**Idi indasin nen Jesus ey ebadeg i pamatira, kowan to so nonta emansekit ey, Sota basol mo, epakawanan.**

1 San Juan 2:15, 16

Saja kompormin ngaaw ja wára so ni karakdan shiya dobong, aliwen sotan et ngo mowan i jo piyanen. Ta no sipay toon sajay i wared nemnem to, eg ngo mebedin na may-inshas ja sesmekan tos Apo Shiyoš ja Ametayo. Jet sajay ira sotan na ngaaw ja wára so ni karakdan shiya dobong: sota ngaaw wa itsoren pengamkam ni kompormi, sota ngaaw wa pangkep no wáray asen, sota pengitangsit ni kasesaad ni biyag. Sajay ira, aliwen si Ametayo ja si Apo Shiyoš i edapoan to, no diket sajay i ogadi ni karakdan shiya

dobong ja eg emati son si-kato.

Tito 2:11, 12

Ta sota kaasi nen Apo Shiyoš, inpa-sas to ma niman, jet sotan i mebedin na onbaal ja mengisedakan ni angken sipen too. Jet sotan met laeng i emengitosho son si-katejo, ey ibi-jag tayo sota aramid ja aliwen eshiyosan, ono sota nemnem ja mengamkam ni ka-iri-irin ja wared ja dobong. Sotan na kaasi nen Apo Shiyoš i emengitoshong met laeng son si-katejo ja manbiyag ni kinatalna, ono kinashtonong, tan mandeka ni piyanen Apo Shiyoš niman na timpo ja wára kitod ja dobong.

## San Juan 3:3

Jet si Jesus, simongbat ja kowan to ey, Kinapodpodno iya ikowan ko son si-kam. Angken sipa, eg mebedin na asen toy pantoshayan nen Apo Shiyos, no eg may-enak mowan.

## 1 San Pedro 1:23

Niman, waray badon biyag jo, jet sajay ya badon biyag jo, edapo so nen Apo Shiyos. Aliwen na inges to sota biyag ga wara son si-kayo nonta inkayanak jo. Sajay ya biyag ja wara son si-kayo niman, biyag ja enshiy to engintegan, ja inakan nen Apo Shiyos son si-kayo nonta emati kayo nonta esel to ja intenengan

jo nontan da. Manakabalin iyay ya esel tep si Apo Shiyos ja edapo-an to, wara ni olay shi biyag ingkatod ingka.

Jet angken siper too ja memati so nen Cristo, mebediwan i wared nemnem to; singa badon palsowa ma. Sota sigod ja ogadin ngaaw, enshi mala, jet sota bado, si-katoy naysa-dat ma. —2 I-Korinto 5:17

## 1 San Juan 5:18

Amta tayo ey si-katejon annak nen Apo Shiyos, inbi-jag tayon manbesol ma, ta si Jesucristo ja Anak nen Apo Shiyos, si-katoy emengitoshong son si-katejo shi mapteng. Jet si Satanas, enshiy pesing ton onsharal son si-katejo.

Nonta eg kayo pay laeng emati,  
may-eshig ey singa etey kayo  
kabol ni basol jo. Nem niman, si  
**Apo Shiyos, inpanbiyang shakejo.**

... Jet niman, may-eshig ey  
ebiyag kito mowan, ja nayda-kam  
son Cristo ni inpan-ongal to, jet  
may-eshig ey inpanbalin shakito  
men kait nen Cristo Jesus ja man-  
toshay shi dangit.

—I-Ipiso 2:1 tan 6

Niman, ta badoy biyang jo, ja  
may-eshig ey ekibiyag kayo son  
Cristo, tan nayda-kam kayo son  
si-kato ni inpan-ongal to, mesepol  
la say toshongan ni poso jo, sota  
pengonod ni mapteng nga ogadi  
nen Cristo. Ta si Cristo niman,

wared dangit, ja in-aknan nen Apo  
Shiyos ni panakabalin ton man-  
toshay. —I-Kolosas 3:1

Ta sota basol tayo, si-katoy  
toka pan-ikaro nonta inkaydansa  
tod koros, jet sajay i dingka to say  
si-katejo ngo, enshi may kaybi-  
yang tayod basol. Isonga may-  
eshig ey sota ira sogat to nonta in-  
kaydansa to shi koros, si-katoy  
singa engilteg son sikayo.

—1 San Pedro 2:24

Sota toon wara son Cristo  
Jesus, singa inpakilansara shi  
koros sota ngaaw wa ogadira, pati  
sota ngaaw ja istay pipiyan sha,  
jet inbiyang sha ma sotan iren  
ngaaw. —I-Galasia 5:24

## San Juan 17:3

Jet no mewad-an ma ira ni biyag ja enshiy to engintegan, sikato may amta-an sha son si-kam, ey si-kam i podnon Shiyyos ja enshiy eshom, tan si-kato ngoy amta-an sha son si-kak, ey si-kak si Jesucristo ja inbetkag mo alid ja dobong.

## San Juan 3:36

Sota toon memati so nonta Anak nen apo Shiyyos, may-aknan ni biyag ja enshiy to engintegan, nem sota eg memati so nonta Anak nen Apo Shiyyos, eg may-aknan nonta biyag ja enshiy to engintegan, no diket emansesses-  
ked son si-kato sota penosa nen

Apo Shiyyos ja shosen ingkated ingka.

## I-Roma 6:23

Isonga say sobadit ni basol, patay ingkated ingka, nem waray dibshin i-akan nen Apo Shiyyos so nonta ira wara son Cristo Jesus ja Apo tayo; si-kato sota biyag ja enshiy to engintegan.

## San Juan 5:24

Kinapodpodno iya ikowan ko son si-kayo. Sota memati nonta ikowan ko tan memati son Amak ja engibetkag ali son si-kak, sikatoy ewad-an ni biyag ja enshiy to engintegan, jet eg to da-kaman na meshosa, ta wara son si-kato sota biyag ja edapo son Apo Shiyyos.

## I-Galasia 4:6

Niman ma, annak shakejo nen Apo Shiyos; isonga inbetkag to sota Ispirito Santo ni Anak to ja man-iyang shi poso tayo. Jet sajay i amta-an tayo so ey Ametayo ma si Apo Shiyos.

## 1 San Juan 3:18, 19

Si-kayon naka ikarin annak ko, say semek tayo koma shi kait tayo, aliwen sota notnotnot ono esel bengat ja emedepod bongot, no diket mesepol la podnon semek ja waray maykaasi shi eshom. No waray semek tayo so ni eshom, sotan i amta-an tayo so ey wara kito son Apo Shiyos ja kedepo-i ni

podno, jet enshi may shanag tayo no ewaten shakito nen Apo Shiyos ono enshi.

## I-Roma 8:16

Waray kepedekna ni Ispirito Santo nen Apo Shiyos shi nemnem tayo ey annak shakito nen Apo Shiyos.

## San Juan 14:21

Sota etod-an ni bilin ko, ja mengonod so, si-kak i ensemek to, jet sota waray semek to son si-kak, ensemek ngo nen Amak, jet angken si-kak, ensemek ko ngo. Jet wara pay i pa-amtak so non-tan na too say amta-en towak ka pasiya. Kowan nen Jesus.

## I-Galasia 2:20

Singa eteyak ja inpakidansara-ak son Cristo shi koros, jet niman, sajay ya biyag ko, aliwen sota sigod, no diket si Cristo iya wara ma son si-kak. Isonga say emengitoshong ni biyag ko niman, sota naka pemati son Cristo ja Anak nen Apo Shiyos. Si-katoy ebadege i semek to son si-kak, jet si-katoy mismon etey shi koros say ikaro to sota istay ikarok koma.

## 1 San Pedro 1:8

Amtak ey ingkato niman pay laeng ket eg jo inon-an si Jesucristo nem waray semek jo son si-kato, tan joka pati-a i bilin to. Enshiy kay-ingesan ni imdeng

jo—eg kabaalan ni esel ni too ja mengikowan ni kaba-deg to tep edapo nodta namnama tayon mayda-kam son Apo Shiyos shi dangit.

## San Juan 15:11

Sajay i kowan ko son si-kayo, say mayda-kam kayo nodta imdeng ja wara ngo son si-kak, jet mas pay ya man-imdeng kayon pasiya.

## San Juan 17:13

Jet niman, shanshani mala sota i-olik son si-kam, nem ikowan ko iyay son si-kara ta wara-ak nin shiya dobong, say mepno ngo ira nonta imdeng ja wara son si-kak.

## I-Roma 2:13

Sotan i pesing nen Apo Shiyos, ta aliwen sota mengitneng bengat ni bilin to i kosto-an nen Apo Shiyos so ni too, no diket sota ononod ja tongpalen to sota bilin, sotan i kosto-an nen Apo Shiyos.

## 2 I-Tisalonika 1:7-9

Jet si-kayon nandigat, si Apo Shiyos aliy mengikan ni pannamayan jo, kasta met son si-kami. Sajay i pesing to ni imotok mowan ali nen Apo Jesus ja medepod dangit. Odopen to ali sota anghil to et ma-on-an na mismo sota ebadeg ga panakabalin to tan wara pay i apoy ya emanshedang. Jet shosa-en to ira sota toon ma-

kadedamsis son Apo Shiyos, tan eg memati pay ni toro pangkep son Apo Jesus, jet say shosa sha, maysi-jan ira son Apo Jesus et eg sha asen i mismon kinashiyos ton emenenili. Eg ira may-aknan ni biyag ja enshiy to engintegan, no diket meshosa ira ingkated ingka.

## Inpa-amta Nen Jesucristo 22:14

Si Apo Shiyos bindisiyonan to sota ira may-eshig ey mengibel-ak ni baro sha, tep si-karay waray nebeng shen mayda-kam ja men-gan nonta dames nonta kadasan ja emengi-kan ni biyag. Jet si-kara bengat i maypedobos ja onsekep nodta siyodad.

Jet angken sipa, ikowan sha met laeng ey si Jesucristo, si-katoy Apo, jet sotan i kayshed-jawan met laeng nen Apo Shiyos ja Ameto.

—I-Pilipos 2:11

San Mateo 10:32, 33

Sota toon mengikowan so ni kait ton too ey sikato ket took, ikowan ko ngo son Amak shi dangit ey sotan na too ket took ka emepiyal. Nem sota toon mengikowan so ni too ey eg towak amta, ibiyang ko ngo shi sango-an nen Amak shi dangit.

I-Roma 10:9, 10

Jet sajay sotan na esel: no ikowan mon mismo, ja eg mo iba-

ing, ey si Jesus bengat i Apom, tan pati-en mo ey si Apo Shiyos ket inpan-ongal to si Jesus, maysedakan ka. Ta no mismon si Cristoy wared nemnem mo ja pinatim, kosto-an toka nen Apo Shiyos; jet no mismon paamtam ngo shi eshom i inpamatim, maysedakan ka.

1 San Juan 2:23

Nem say nemnemen jo, sajay. No sipay too ja eg memati ey si Cristoy Anak nen Apo Shiyos, eg maybidang ey Ametos Apo Shiyos. Nem no sipay toon ememati ey si Jesus i Anak nen Apo Shiyos, si-katoy maka-ama so nen Apo Shiyos.

## 2 I-Tisalonika 2:9

Sota toon kawad-an ni ngaaw wa aramid, ja itorong ali nen Satanas, no onmotok ali, wara son si-kato i panakabalin, isonga kalkalasiy pesing ton mengolbod tan mengi-owap, ja singa kaskashaaw noman.

## I-Ipiso 6:11

Jet nemnem jon osalen sota inakan nen Apo Shiyos son si-katejo ja may-eshig shi almas ja para kobat, say eg shakejo ebaken non-ta taktiko nen Satanas.

## Inpaspasing 26:18

Ibetkag taka so ni aliwen Hodiyos say maynemneman ira ja amta-en sha ey wara ired embol-

inget jet say ontorong ira shi dawag, say maysi-jan ira nodta toray nen Satanas jet si Apo Shiyos may toshongen sha. Jet no memati ira son sikak, mepekawan-an may basol sha, tan maydakam ira ja mekitewid so nonta ira toon pinidi nen Apo Shiyos ja too to. Sajay i inkowan nen Apo Jesus son si-kak.

## 1 San Pedro 5:8

Pantanshaan kayo, bilin jon shorog i bakdang jo ni olay! Ta si Satanas ja makakontra son si-kayo shi pamati, may-eshig nodta kowan sha ey lion ja emaneka-ekad ni toka pengenap ni shesha-len to, ono isekmol to.

Santiago 4:7, 8a

**I**songa mesepol la si Apo Shiyos komay pankombaba-an jo, ja eg kayo onpa-so. Karejo itolok ja sairo-en shakejo nen Satanas, say eshawi-an tokejo. Si Apo Shiyos komay nemnemnemen jo, jet si-kato ngoy wara son si-kayo ni olay.

I-Roma 8:35 tan 37

Jet enshiy mengisi-jan son si-katejo, shi semek nen Cristo, angken nganton digat i onsabi. Angken waray mepesamak ja pansekitan na pasiya ni nemnem tayo, ono wara aliy memedigat son si-katejo, ono wara aliy bitil, ono enshiy ma-osal la baro; ang-

ken dilikaroy biyag tayo, ono angken metey kito, ebadeg ngo eshan i semek nen Cristo son si-katejo. ... Nem emin iyay ya digat ja emepespesamak niman, mengebak kito ngoreshan, tep si Cristo, ebadeg ni olay i semek to son si-katejo.

Hodiyos 2:14

Si-katejon annak nen Apo Shiyos ja inkowan to, nay-anak kito shi too, jet waray daman tayo, tan shaletayo. Isonga si Jesus, nanbalin ngo ja inges toy itsora ni too, Sajay i inpasing to, say no metey, waray pesing to ma ja mengebak nonta emengi-kan ni ketey ni too, ja si Satanas.

## 1 San Juan 4:20

No kaspangarigan ey waray toon mengikowan ey ensemek tos Apo Shiyos, nem en-oges to kariy kait to, sajay ya too, ma-o-owap. Ta kas-ano karin waray semek to son Apo Shiyos ket eg to inon-an? Nem sota kait ton toka as-asa ni olay ket, en-oges to!

## 1 I-Korinto 13:1

Say kapatkan, saja semek. No si-kak, angken bilang ey amtak ka emin i kalkalasin esel ni kait kon too, ono angken sota esel ni ang hil, no enshiy semek ko ni kait ko, singa naka mannoteng bengat ja inges to sota kalsa ja emankakkak.

## I-Galasia 5:22, 23a

Nem sota toon kaishalan ni Ispirito Santo nen Apo Shiyos, iyay iray ma-sas son si-kato: semek, imdeng, talna, anos, pengaasi, mapteng nga nemnem, tan emepiyal pay; amta ton mesinsiya ni eshom, tan amta ton tetngelen shorog i bakdang to.

Nem si-katejo, ensemek tayoy kait tayod pamati, jet sotan i tayoka penigorado-i ey angken metey kito, wara ngoreshan i biyag tayo alin enshiy to engintegan. Nem sota enshiy semek to so ni kait to, ka-onong ja emantoshong shi patey ingkatod ingka.

—1 San Juan 3:14

## Inpaspasing 10:39-41

Jet si-kami i onpaneknek so ni emin na inon-an min dingka to shi ili min Hodiyos, pati shi Jerusalem, jet mismon inon-an mi pay ja indansara shi koros ni inbono sha so. Nem si Apo Shiyos, inpanbiyag to nonta maykatdon akew, jet waray nanpa-sasan to. Nem aliwen emin na too ket inon-an sha. Say engasas bengat son si-kato, si-kami ja shinotokan nen Apo Shiyos ja mengikowan ni maypangkep son si-kato. Nonta naksheng nga nanbiyag, ekipenggan pay son sikami.

## San Juan 20:26-28

Idi edabas day makadomingko,

na-olnong mowan sota ira too nen Jesus, ja nanbagat, jet wara ma nodtan si Tomas. Jet si Jesus, ebigla ja nanpa-sas mowan son sikara. Dimayat shi sango-an sha, ja kowan to ey, Sapay koma ta sota talna ket si-katoy mewesha son si-kayo. Jet kowan to ma so nen Tomas ey, Asas mo iya takday kon imbot ni dansa, jet igawat mo diy kalomot mo. Tan igawim pay ali ita takday mo jet irodog mod ja tagdang kon esogat. Kareka manshowashowa, no diket pamati ka et. Si Tomas, simongbat ja kowan to ey, Si-kam i Apok tan Shiyos ko!

Amtayo met ey nonta ebonjagan kito ja nayda-kam son Cristo Jesus ket ebonjagan kito ngo ja nayda-kam ni inkatey to. Sota inpanbonjag tayo, say kayeshigan to, singa etey kiton nayda-kam so nen Cristo ja naybeka. Jet say sakey pay ja kay-eshigan ni inpanbonjag tayo, singa naydakam kito so nen Cristo nonta inpanbiyag so nen Apo Shiyo maypangkep ni pankabalin to, say mebado-an ngoy biyag tayo niman na wara kitod biyag. Ta no si-katejo ket nayda-kam kiton singa etey, ja kadwa nen Cristo, mayda-kam kito met laeng son sikato ja man-ongal ja inges to.

—I-Roma 6:3-5

Kinapodpodno iya ikowan ko son si-kayo. Say too, singa mayeshig ey etey pangkep ni basol, nem no itenengan sha niman sota ikowan ko, may-aknan ira ni biyag, ta si-kak sota Anak nen Apo Shiyo. ... Karekayo messhaaw ni sajay ya inkowan ko la, ta waray onsabi alin timpo, ja sota ira nanketey, itenengan shay esel ko, jet onbangon ira di. Jet sota mapteng i aramid to nonta mabiday pay laeng, may-aknan ira ni biyag ja enshiy to engintegan, nem sota nankekedsel, manbiyag met laeng ira, nem meshosa ira.

—San Juan 5:25 tan 28, 29

## 40 Edinis Kito Koma Shi Sango-An nen Apo Shiyos

### 2 I-Korinto 7:1

Si-kayon a-akik shi pamati, emin ira jay ya kari nen Apo Shiyos, si-katejoy inkari-an to so. Isonga mesepol la niman ma, ibijag tayo sota ngaaw wa aramid ja singa emengi-kan ni dogit ni bakdang tayo tan nemnem tayo, jet say nemnemen tayo ma, si Apo Shiyos. Si-kato pay i mesepol la tekotan tayo, say may-inges kito nodta ogadi to.

### 2 Timoteo 2:21

Sajay i kay-eshigan ni si-katen emati. Isonga sota toon ngaaw to ma jen manbesol, si-kato sota may-eshig ey pingkan na epateg so nonta makakokowa so. Anam

ton sota makapingkan na mismoy mengosal so, ta esagana ja masosal shi emin na mapteng nga pangkep.

### 1 San Pedro 1:15

Nemnem jo ey si Apo Shiyos, si-katoy emili son si-kayo ja mabedin ni too to. Si-kato, enshiy basol to; isonga mesepol la si-kato ni olay i onoran jo ni emin na joka dagdag-a.

### San Lucas 1:74, 75

Si-katoy mengibediw son si-katejo shi kabakal tayo, say mewedja-an kito ni olay ja mansilbi son si-kato, ingkatod ketey tayo, ja enshiy to asen na pankodangan tayo ono kebedawan tayo.

Dagejoy kabaalan jonmekikad-wa so ni angken siperen too say en-shiy bakal, tan paras jon man-biyag ja inges toy itsora nen Apo Shiyos, ta no enshi iyay ya ogadi son si-katejo, eg tayo asen na mismo si Apo Shiyos.

—Hodiyos 12:14

Jet kowan pay nen Juan ey, Nem si-kak, dimawak ali ja shanom i inpamonjag ko son si-kayo, ni inpanbebawi jo, nem waray ondaw alin maysa-dat son si-kak ja ebadbadeg i panakabalin to nem say si-kak. Jet ekak pay maykeshi ja angken baga-en to koma ja mengkal ni sapatos to.

Sotan aliy onbonjag son si-kayo ni Ispirito Santo nen Apo Shiyos, asan pay ya apoy.

—San Mateo 3:11

Nem no ipodno tayoy basol tayo, pekawanhan shakitejo nen Apo Shiyos, jet omasen toy aramid tayon ngaaw et sa-datan to ni mapteng. Sajay i pesing to ta mepiyal ja mengaasi tan mapteng ni olay i toka dagdag-a, enshiy toka pankodangi. —1 San Juan 1:9

Nonta eg pay laeng epalsowa iya dobong, sigod pay laeng ja pinidi shakito ja memati so nen Cristo, say enshiy tayo kebedawan, ono tayo pankodangan, ni pengidmang to son si-katejo.

—I-Ipiso 1:4

## To-on Napno-an ni Ispirito Santo

**San Lucas 11:13**

Si-kayo, angken ngaaw i aramid jo, amtayo met ja mengi-kan ni mapteng nga ibaga ni anak jo. No satan i wara son si-kayo, mas pay ya amta nen Apo Shiyos ja Ame-jod dangit ja mengi-kan ni map-teng nga banag so nonta emeng-shaw son si-kato ni kasapolan to. I-akan toy Ispirito Santo to so ira nonta manbeka son si-kato.

**I-Roma 8:9**

Nem si-kayo, aliwen say joka on-onora ket sota sigod ja nem-nem jo nonta eg kayo pay laeng emati, no diket sota pengitoshong ni Ispirito Santo nen Apo Shiyos. Ta agpayson sota Ispirito Santo

nen Apo Shiyos ja wara son si-kayo ket si-kayoy emengitoshong son si-kayo. Nem sota ira enshiy Ispirito nen Cristo son si-kara, enshi ngo ira so nen Cristo.

**Inpaspasing 4:31**

Jet idi naksheng nga nan-shawat ira son Apo Shiyos, kimiwed sota baley ya esa-nopan sha, jet emin ira, enapno ira ni Ispirito Santo jet etoled ma ira ja mengikowan ni esel nen Apo Shiyos.

**Inpaspasing 13:52**

Jet sota ira emati shi Antiok, ja indekjas shi Pablo, ebadeg i im-deng sha jet inshalan pay ira ni Ispirito Santo nen Apo Shiyos.

## San Mateo 6:33

Nem say epateg jen mesepol la nemnemen jo, sota pantoshayan nen Apo Shiyos, tan sota mapteng ja piyan ton dag-en jo. Jet no sajay i pesing jo, emin na banag ja kasapolan jo, i-akan to.

## 1 San Pedro 4:12, 13

Si-kayon ensemek ko, eg kayo koma messhaaw nonta ebadeg ga digat ja joka panda-kami niman, ta sajay, emankepasemak say masas no agpayso i pamatiyo son Apo Shiyos. Eg jo koma ikowan ey apapil iyay ya emankepasemak son si-kayos, ta mepesamak ngoreshan iyay. Say nemnemen jo et mango, pan-imdeng kayo no da-

kaman joy digat, ta singa ekilikat kayo shi digat ta dina-kaman nen Cristo nontan da. Et pan-imdeng kayo, ta shi ma-onod alin timpo, ja asen jon mismo i panakabalin ni idaw to ali, mas ebadbadeg pay ali i pan-imdeng jo.

## Inpa-amta Nen Jesucristo 21:4

Po-naren toy sayesha et enshi mala i metey; enshi pay i mandeshingit ono onnangis, tan enshi pay mala i ensakit. Ta sota sigod ja emengi-kan ni digat, enshi mala.

Jet nemnemnem jo ey wara-ak ni olay son si-kayos, ingkated pantepos niya dobong. Kowan nen Jesus. —San Mateo 28:20b

## Karkari para so ni Egmesa-ol

Jet no dag-en jo iyay, si Apo Shiyos ja kedepo-i ni talna, ipalobos ton ebaken jo shagos ira jay ya too nen Satanas, ja singa mebedin na ikatin jo ma ira.

—I-Roma 16:20a

Mebindisiyonan sota toon eg to tengdawan i digat tan eg ro itolok i kesairo to. Sotan i ka-asan to ey podnoy pamati to, isonga say konoren to, sota biyag ja enshiy to engintegan, tep si-katoy inkari nen apo Shiyos ja i-akan to so non-ta ira toon waray semek to son si-kato.

—Santiago 1:12

Amta tayo ey si Apo Shiyos, toka i-anap i panmaptengan nonta

toon waray semek sha son si-kato. Sajay i toka pesing ni olay shi angken ngaranton mepesamak son si-kara, tep si-karay sigod ja ninemnem nen Apo Shiyos sa masosal shi piyan ton medeka shiya dobong.

—I-Roma 8:28

Ingkato niman, sota kaonsabi son si-kayon awis ja manbesol, aliwa et ngon epalado, no diket kenshat ta sotan i kaonsabi so ni emin na totoo. Nem angken ngantoy onsabi ali, si Apo Shiyos i pashindan jo, ta eg tokejo i-oway no eg jo posi-en. Si-kato met laeng i mengi-kan ni kedsang jo ja mengenos say eg kayo ma-ebak.

—1 I-Korinto 10:13

## Inpa-amta Nen Jesucristo 3:5

Sota ira mengenos ni digat, ja eg ma-ebak, may-aknan ira ni em-potin baro sha et sota ngaran sha, ekak omasen shima dibsho ja nay-solatan ni ngaran ira nonta nay-aknan ni biyag ja enshiy to engin-tegan. Jet ikowan ko ngo so nen Amak tan so nonta ira anghil to ey sajay iray took, ireka mepiyal.

## Inpa-amta Nen Jesucristo 3:12

Sota ira mengenos ni digat, ja eg ma-ebak, si-karay panbedin kon may-eshid ey tokod nonta Timplo nen apo Shiyos. Jet eg mebedin ma ja maysi-jan ira son Apo Shiyos. Malka-an ko pay ira ni ngaran nen Apo Shiyos, tan

sota ngaran ni siyodad to ja badon Jerusalem ja medepo son si-kato alid dangit. Malka-an ko pay ira ni badon ngaran ko.

## Inpa-amta Nen Jesucristo 3:21

Sota mengenos ni digat, ja eg ma-ebak, si-karay ikowan ko ey maydakam ja mekitongaw son si-kak shima pantoshayan ko. Ta ang-ken si-kak, inenosan koy digat et nayda-kamak ngo ja mekitongaw so nen Amak shi pantoshayan to.

## Inpa-amta Nen Jesucristo 21:7

Tep sotan i koston kayda-kaman ira nonta enganos ni digat ja eg naabak. Jet si-kak ma i etopog ga Shiyos sha et si-kara ma i annak ko.

## San Lucas 16:18

Say sakey ya bilin nen Moises ja eg mebedin na mebediwan, kowan to ey say dakin mengisi-jan ni asewa to, ja meki-esawa mowan, bimasol ja inges to sota emii. Inges to ngo met laeng, no sipa ngoy mengesawa nonta biin insi-jan sha, bimasol ja inges to sota emii.

## I-Roma 7:2, 3

Kaspangarigan, sota biin waray asewa to, kapiditan na tongpalen to sota bilin maypangkep ni san-asewa, tep sota asewa ton daki, mabiday pay laeng. Nem no metey sota daki, angken eg to ma tongpalen sota bilin pangkep ni

san-asewa. Nem no sotan na bii ket waray apil la daki to, angken na wara sota sigod ja asewa to shi biyag, ikowan sha ey ekileki sotan na bii. Nem no etey sota asewa ton daki, asan maki-sawa mowan, eg sha ikowan ey daki to bengat sotan na maykadwen asewa to.

## San Mateo 5:32

Nem say ikowan ko pay son sikayo, sota dakin mengisi-jan ni asewa to, ey eg ekileki sota bii, sikatoy engi-kan ni nanbasolan non-ta asewa ton bii. Jet sota mengesawa ngo nontan na biin naysi-jan, nanbasol ngo ja singa emii.

## San Juan 14:3

No meksheng nga isaganak sotan na dogad ja pan-iyanan jo, on-oli-ak ali et al-en takejo, ta piyan kon shima kad-an ko ket si-kato ngoy pan-iyanan jo.

## Inpa-amta Nen Jesucristo 3:11

Magenoy i-olik ali mowan, isonga sota wara son si-kayo, si-katoy nemnemnemen jo, say sigoradon ewaten jo sota konkona jo.

No sota toon embaing nga mengikowan ey si-kato ket took, ono embaing nga mengikowan ni esel ko no maydaok shi totoon eg mannemnem so nen Apo Shiyos tan toon mabesol, ibaing ko ngo sotan na too no ondawak alin

mantoshay. Agpayson si-kak sota kowan nonta para padto nonta bayag da ey Anak ni Too, jet sotan alin idaw ko mowan, say kasesaad ko, inges ko met laeng i kasesaad nen Apo Shiyos. Tan may-odop ali sota ira anghil to son si-kak. —San Marcos 8:38

## Santiago 5:8

Pan-anos kayo ngo, karekayo medismaya, tep sota akew wa idaw mowan ali nen Apo Jesus, shanshani ma.

## San Mateo 24:27

Ta say itsora ni idaw ali mowan nonta kowan ni padto ey Anak ni Too, inges toy bagidat ja silwan to shagos i emin na naykayang.

Si-kayon kait kod pamati ja ensemek ko, amta tayo ey annak shakito nen Apo Shiyo, nem niman, eg to pay inpaamta son si-katejo no ngantoy panbedinan tayo di. Nem amta tayo ey no on-motok alis Cristo, asen tayon mismo, jet ingesen tayo may itsora to.

—1 San Juan 3:2

### San Mateo 16:27

Epateg, ta no sakey alin timpo, emin sota aramid ni too, si-kak met laeng i onsobadit son sikara. Agpayson si-kak sota kowan non-ta para padto nonta bayag da ey Anak ni Too, jet sota idaw ko ali mowan, say kasesaad ko, inges ko met laeng i kasesaad nen Apo

Shiyos. Jet may-odop ali sota anghil ko son si-kak.

No sota makabaley ket amta to koma no ngaranton oras ni edabi i idaw ali nonta mengibot, kenshat ta mansekana, eg to itolok ka onsekep sota mengibot shi baley to. Jet angken si-kayo, masepol la esagana kayo ni olay. Kowan nen Jesus.

—San Lucas 12:40

Kowan nonta anghil son si-kara ey, Daleki ja i-Galilia, ngantoy tinangkakan jo pay laeng shi dangit? Sajay ya si Jesus ja engilekjas son si-kayo ni indaw to la shi dangit ja nay-olop shi kolpot, inges niyay met laeng aliy i-oli to.

—Inpaspasing 1:11

# Esel nen Apo Shiyos

San Lucas 21:33

Sama naykayang tan saja do-bong; mebedin na maenshi, nem saja esel la inkowan ko, kenshat ta metongpal, ja eg ma-enshi.

Hodiyos 4:12

Sota esel nen Apo Shiyos, aliwen pampamaayan, ta naytakshol nodtan i biyag to; isonga waren kenshat i banag to. May-eshig ey singa sota kampilan ja nanbangi i tarem to, nem mas pay ya maked-kedsang sota esel to. Ta sota kampilan, toka des-anga i nansi-silpo-an ni pokel bengat, ja toka sebi-a i otek, nem sota esel nen

Apo Shiyos, kabaalan ton des-angen i nemnem tan dinawa ni too, jet toka idasin pay i angken nganton wared nemnem tan pang-kep ni emin na too.

2 Timoteo 3:16

Si Apo Shiyos i makanemnem nonta emin na inpaisolat to nonta bayag da; isonga epateg ira sotan shi pengitoshio maypangkep nonta pamati, tan sotan pay i mengipamta ni nankolangan tayo, tan sotan pay i mengitoshong son si-katejo shi panmaptengan tayo. Sotan met laeng i mengilteg ni tayoka panbibiyag ni inakew, say maytop shi piyan nen Apo Shiyos.

Scripture text used is from *Dibshon Mengi-kan ni Pansigshan* © New York International Bible Society 1978. Used by permission.

---

Published in numerous languages by World Missionary Press, Inc., as God supplies funds in answer to prayer. **For questions or more information by country, visit: [www.wmp-contacts.org](http://www.wmp-contacts.org)**

World Missionary Press  
PO Box 120  
New Paris, IN 46553-0120 USA  
[www.wmpress.org](http://www.wmpress.org)